

APPERLEY, CHARLES JAMES (1779 - 1843), awdur llyfrau ac ysgrifau ar hela, rhedegfeydd ceffylau, etc., dan y ffugenw ' Nimrod '.

**Enw:** Charles James Apperley

**Ffugenw:** Nimrod

**Dyddiad geni:** 1779

**Dyddiad marw:** 1843

**Priod:** Winifred Apperley (née Wynn)

**Plentyn:** William Wynne Apperley

**Rhiant:** Thomas Apperley

**Rhyw:** Gwryw

**Galwedigaeth:** awdur llyfrau ac ysgrifau ar hela, rhedegfeydd ceffylau, etc.

**Maes gweithgaredd:** Llenyddiaeth ac Ysgrifennu; Natur ac Amaethyddiaeth; Chwaraeon a Gweithgareddau Hamdden

**Awdur:** Edward Morgan Humphreys

Ganwyd ym Mhlas Gronow (a chwalwyd weithian) ger Wrecsam, 1779, ail fab Thomas Apperley; ei fam yn ferch i [William Wynn](#), Maes y Neuadd, Talsarnau, Meirion, rheithor Llangynhafal. Aeth i ysgol Rugby, 1790; yn 1798 penodwyd ef yn gornet yng nghatrawd [Syr Watkin Williams Wynn](#), yr ' Ancient British Light Dragoons,' a bu gyda'r gatrawd yn Iwerddon. Yn 1801 priododd Winifred, merch [William Wynn](#), Peniarth, Meirion, ac o 1813 hyd 1819 bu'n oruchwyliwr ystad ei frawd-yng-nghyfraith yn Sir Gaernarfon, gan fyw yn y T Gwyn, Llanbeblig, ger Caernarfon. Yn ei hunangofiant, *My Life and Times*, y mae ganddo bennod ar ' hela o Lanbeblig.' Wedyn bu'n byw mewn gwahanol leoedd yn Lloegr, yn amaethu ac yn hela.

Collodd y rhan fwyaf o'i arian ac yn 1822 dechreuodd ysgrifennu i'r *Sporting Magazine* dan yr enw ' Nimrod.' Tynnodd ei ysgrifau sylw ar unwaith a chynyddodd cylchrediad y *Sporting Magazine*, ond yr oedd ei ofynwyr yn pwyso arno a bu rhaid i Apperley fyned i fyw i Calais yn 1830. Dychwelodd i Loegr yn 1842, a bu farw yn Upper Belgrave Place, Pimlico, 19 Mai 1843. Bu ei ail fab, Major WILLIAM WYNNE APPERLEY, swyddog ym myddin India, farw ym Morben, ger Machynlleth, 25 Ebrill 1872.

Ymhlith y llyfrau a ysgrifennodd Apperley y mae *The Chace, the Road and the Turf*(1837), *Memoirs of the Life of John Mytton* (1837), *The Life of a Sportsman* (1842), a *Hunting Reminiscences* (1843). Yn ystod yr amser y bu yn Ffrainc bu yn aelod o staff y *Sporting Review*, ac, ar gais J. G. Lockhart, ysgrifennodd i'r *Quarterly Review* ar ' Melton Mowbray,' ' The Road,' a ' The Turf.' Yn ei hunangofiant ceir darlun diddorol o fywyd y dosbarth tiriog yng Nghymru tan ddiwedd y 18fed ganrif a dechrau'r 19eg.

## Awdur

Edward Morgan Humphreys, (1882 - 1955)

## Ffynonellau

*Oxford Dictionary of National Biography*

C. J. Apperley, *My Life and Times* (1927)

## Delweddau

National Portrait Gallery: [Charles James Apperley](#)

## Dolenni Ychwanegol

VIAF: [79466848](#)

Wikidata: [Q4068173](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

